



Komunikadu Imprensa
22 Dezembru 2020
Parlamentu Nasionál

JSMP husu ba Instituisaun Estadu sira atu Ezekuta Orsamentu 2022 ho Responsabilidade, Transparánsia no Akontabilidade

Parlamentu Nasionál, Kinta-feira 16 Dezembru 2021, liuhusi reuniuan plenária, aprova iha finál globál Proposta Lei Nú.35/V(4^a) kona-ba Orsamentu Jerál Estadu (OJE) ba tinan 2022 ho votu afavór 44, kontra 21 no abstain 0. Montante total OJE 2022 ne'ebé aprova ne'e hamutuk billiaun US\$2. Total orsamentu ne'e inklui ho orsamentu husi fundu impréstimu no doasaun husi parseiru dezvoltimentu sira.

Programa prioridade ho nia orsamentu ne'ebé bo'ot liu iha 2022 mak Boa-Governasaun no Jestaun Institusionál ne'ebé nia objetivu atu sustenta mákina Estadu, tuir kedas ho Igualdade Jéneru no Inkluziun Sosiál, Estrada no Ponte, Programa Saúde, Edukasaun no Formasaun no Eletridade.

“JSMP apresia esforsu no serbisu Parlamentu Nasionál no Governu hodi aprova ona OJE 2022 tuir tempu. Nune'e, JSMP husu atu Governu no Instituisaun Estadu sira atu ezejuta orsamentu Estadu 2022 nian ne'e ho responsabilidade, transparánsia no akontabilidade tuir Lei OJE 2022 nian bazeia ba programa ne'ebé aprova ona iha Parlamentu Nasionál”, dehan Diretora Ezekutiva JSMP, Sra. Ana Paula Marçal.

Iha parte seluk, JSMP mós husu atu Parlamentu Nasionál kontinua ativu iha hala'o nia knaar fiskalizaun ba ezejusaun OJE 2022 nian ne'e no Komisaun Anti Korrupsaun (KAK), sosiedade sivil no entidade hotu inklui comunidade no ajénsia internasionál sira hotu ne'ebé iha nia representante iha Timor-Leste atu hola papél iha serbisu auditoria sosiál hodi asegura transparénsia no akontabilidade, liuliu ba programa prioridade hirak ne'ebé mensiona iha leten ne'ebé ho nia montante orsamentu bo'ot.

Ámbitu OJE 2022 iha previzaun ba órgaun serbisu setór públiku administrativu sira ne'ebé kompostu husi Administrasaun Sentrá, Rejiaun Administrativu Espesial Oekussi-Ambeno no Orsamentu Seguransa Sosiál inklui introdus mós medida foun sira kona-ba subsidu ai-han ba funsionáriu públiku, apoiu impreza midia no ki'ik, fundu investimentu ba establesementu munisípiu foun Atauro, *bolsa da mae* no medida sira seluk ne'ebé Lei OJE prevee ona.

Alende ne'e, iha orsamentu ne'e deskreve mós despeza planeadu sira husi entidade Estadu oinoin nian hamutuk 45 ne'ebé enkaixa hamutuk iha Ministériu, Sekretária Estadu no Instituisaun Públika Estadu sira nian ho nia objetivu mak atu atinje dezvoltimentu ida ne'ebé qualidade ho kresimentu ekonómiku ne'ebé inkluzivu no sustentável.

Atu hetan informasaun liutan favór kontaktu:

Ana Paula Marçal

Diretóra Ezekutiva JSMP

Diresaun e-mail: ana@jsmp.tl

Website: <http://jsmp.tl>

Rua Beco Lakateu, Aldeia Manufiuk,
SukuColmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

ana@jsmp.tl

Facebook: www.facebook.com/timorleste.jsmp

Twitter: @JSMPtl